

EXD 178(AI)

Llywodraeth Cymru

Penderfyniad Gweithredu'r Comisiwn a Gymathwyd (EU) 2018/1136

Rheoliadau Ffliw Adar (Mesurau Atal) Cymru) 2006

Trwydded gyffredinol i drefnu ffair, marchnad, sioe, arddangosfa neu grynhoad arall sy'n cynnwys casglu dofednod at ei gilydd yng Nghymru

- 1) Yn unol â rheoliad 6(1) o Reoliadau Ffliw Adar (Mesurau Atal) (Cymru) (O.S. 2006/2803 (Cy. 242)) ("Rheoliadau 2006"), mae Gweinidogion Cymru yn rhoi'r drwydded gyffredinol hon sy'n caniatáu crynhoi dofednod ac eithrio'r adar a ddisgrifir isod, ar yr amod fod y trwyddedai yn cydymffurfio â'r amodau yn yr Atodlen:
- 2) Mae asesiad risg milfeddygol wedi cael ei gynnal yn unol â rheoliad 6(3)(a) o Reoliadau 2006.
- 3) Mae Gweinidogion Cymru yn fodlon (yn ddarostyngedig i'r amodau yn yr Atodlen), na fydd crynhoi a symud adar i grynoadau, ac oddi yno, yn cynyddu'n sylweddol y risg o drosglwyddo feirws y fflw adar.
- 4) Mae'r drwydded gyffredinol hon yn berthnasol i'r broses o gasglu dofednod mewn ffeiriau, marchnadoedd, sioeau, arddangosfeydd a chrynoadau eraill sydd i'w cynnal ar neu ar neu ar ôl 00:01 ar 23 Mehefin 2026, yn ddarostyngedig i'r amodau yn yr Atodlen.
- 5) Yn unol ag Erthygl 4(4)(e) o Benderfyniad Gweithredu'r Comisiwn (UE) 2018/1136 (" y Penderfyniad ") mae Gweinidogion Cymru yn rhoi'r drwydded gyffredinol hon sy'n caniatáu, yn amodol ar gydymffurfio gan y trwyddedai â'r amodau yn yr Atodlen, crynhoi adar a ddisgrifir ym mharagraff 1 yn yr ardaloedd risg uwch a nodwyd gan Weinidogion Cymru dan y Penderfyniad.
- 6) Mae asesiad epidemiolegol wedi'i gynnal yn unol ag Erthygl 4(1) o'r Penderfyniad.
- 7) Caiff Gweinidogion Cymru ddiwygio, atal dros dro neu ddirymu'r Drwydded Gyffredinol hon unrhyw bryd yn ysgrifenedig, gan ddod i rym yn syth os bydd yr asesiad risg milfeddygol yn newid mewn perthynas â'r risg y bydd y feirws fflw adar yn ymledu yn unol â rheoliad 3(1) o Reoliadau 2006.

Mae'r drwydded gyffredinol ar gyfer dofednod (dyddiedig 22 Ebrill 2026) drwy hyn yn cael ei dirymu o 00:01 ar 23 Mehefin 2026.

Llofnodwyd gan Natalie Sampson, Dirprwy Brif Swyddog Milfeddygol Cymru

Dros ac ar ran Y Gweinidog Cabinet Gwydnwch Gwledig a Chynaliadwyedd, un o Weinidogion Cymru

Am 17:30 ar 22 Mehefin 2026

Mae peidio â chydymffurfio â'r drwydded hon yn drosedd dan Reoliadau 2006 a gall person a geir yn euog wynebu dirwy a/neu garchar o dan adran 73 o Ddeddf Iechyd Anifeiliaid 1981.

Atodlen amodau

Cyffredinol a dehongli

1) Yn yr Atodlen hon:

- “trwyddedai” yw’r sawl sy’n trefnu’r crynhoad adar ac sy’n gyfrifol am gydymffurfio ag amodau’r drwydded hon
- mae “digwyddiad” yn derm arall a ddefnyddir yn yr Atodlen hon ar gyfer un crynhoad
- “cyfranogwr” yw unigolyn sy’n dod ag adar i grynhoad neu’n eu symud o gwrtil crynhoad ar ôl y digwyddiad
- “cwrtil” y crynhoad yw’r holl fannau yn y fangre neu’r cerbyd sy’n cael eu defnyddio ar gyfer crynhoad, sy’n cynnwys mannau lle mae cynnyrch dofednod ac adar byw yn cael eu cadw, a mannau lle mae gwastraff (fel sarn, tail neu ddeunydd gwastraff arall sy’n dod o anifeiliaid) yn cael eu storio
- mae “mangre” yn cynnwys unrhyw dir, adeiladau neu fan arall. Fel nad oes amheuaeth, mae hyn yn golygu pob man cyhoeddus neu breifat, fel meysydd parcio, tir diffaith a chilfannau
- mae “cerbyd” yn cynnwys trelar, lled-drelar neu rywbeth arall a ddyluniwyd neu a addaswyd i gael ei dynnu gan gerbyd arall; rhan o unrhyw gerbyd y gellir ei datgysylltu; a chynhwysydd neu strwythur arall a ddyluniwyd neu a addaswyd ar gyfer ei gario ar gerbyd

Hysbysu

2) Rhaid i’r trwyddedai hysbysu’r Asiantaeth Iechyd Anifeiliaid a Phlanhigion (APHA) o leiaf 7 diwrnod cyn y digwyddiad.

3) Rhaid i unrhyw hysbysiad a fydd yn cael ei gyflwyno i APHA gynnwys yr wybodaeth ganlynol o leiaf:

(a) y dyddiad (neu’r amrywiol ddyddiadau) y bydd y crynhoad adar yn digwydd;

(b) lleoliad y crynhoad, yn cynnwys cyfeiriad post llawn a’r cod post, a rhif CPH (os yw’n berthnasol);

(c) manylion y trwyddedai, yn cynnwys enw llawn y person cyswllt, cyfeiriad cyswllt, rhif ffôn a chyfeiriad e-bost (os yw ar gael);

(d) y nifer a’r math(au) o adar a ddisgwyllir yn y crynhoad;

(e) diben neu ddibenion y crynhoad.

4) Os bydd unrhyw newidiadau i’r wybodaeth a ddarperir yn amod 3, pwyntiau (a), (b), (c) neu (e) neu unrhyw newidiadau arwyddocaol o dan (d) sy’n digwydd rhwng cyflwyno’r hysbysiad ac unrhyw ddigwyddiad, rhaid rhoi gwybod i APHA cyn gynted ag y bo modd cyn y digwyddiad.

5) Os yw’r digwyddiad ar ffurf masnachu rheolaidd neu werthiant o bell neu dros y rhyngwrwyd, rhaid i’r fangre ac unrhyw gerbyd a ddefnyddiwyd gan y trwyddedai ar gyfer crynhoi’r adar yn dilyn y cyfryw werthiant gael ei gofrestru ag APHA, a rhaid i’r trwyddedai roi gwybod i APHA yn flynyddol o leiaf ba mor aml y cynhelir gwerthiannau o’r fath a’u maint.

Bioddiogelwch ac olrhain

6) Rhaid i'r trwyddedai gymryd pob cam rhesymol i atal clefyd adar hysbysadwy rhag lledaenu i'r fangre, o fewn y fangre ac oddi ar y fangre neu'r cerbyd lle mae'r crynhoad yn cael ei gynnal ac mewn achos o'r clefyd neu amheuaeth ohono bydd modd olrhain yr holl adar sy'n mynychu'r crynhoad.

7) Rhaid i drwyddedai unrhyw ffair, marchnad, sioe neu arddangosfa ddarparu cyngor am fioddiogelwch i bob cyfranogwr cyn y cyfryw ddigwyddiad. Rhaid i'r cyngor hwnnw gynnwys:

- (a) argymhelliad y dylai adar gael archwiliad iechyd cyn teithio i unrhyw grynhoed; a
- (b) cyngor y dylai unrhyw adar sy'n teithio o grynhoed i unrhyw fangre (pa un a ydynt yn dychwelyd i'r fangre y daethant ohoni neu i leoliad newydd) gael eu cadw oddi wrth adar eraill yn y fangre honno a bod eu hiechyd yn cael ei fonitro am o leiaf wythnos ar ôl hynny.

8) Rhaid i'r trwyddedai hefyd gynghori cyfranogwyr:

a) i gydymffurfio â'r gofynion cofrestru gorfodol ar gyfer ceidwaid adar a gedwir mewn unrhyw fangre ym Mhrydain Fawr; a

b) ar gyfer unrhyw aderyn sy'n mynychu crynhoad yng Nghymru, bod yn rhaid iddynt fod wedi'u cofrestru a bod yn rhaid iddynt ddarparu eu rhif CPH cyn cael mynediad:

- pan fo'r fangre wreiddiol yng Nghymru neu Loegr, rhaid i'r ceidwad fod wedi'i gofrestru gyda'r [Asiantaeth Iechyd Anifeiliaid a Phlanhigion](#) ar y gofrestr adar a gedwir;
- pan fo'r fangre wreiddiol yn yr Alban, rhaid i'r ceidwad fod wedi'i gofrestru ar [Gofrestr Adar a Gedwir yn yr Alban](#) a weithredir gan yr Asiantaeth Iechyd Anifeiliaid a Phlanhigion.

9) Rhaid i'r trwyddedai beidio â chaniatáu unrhyw gawell, crât, basged neu gynhwysydd arall ar grynhoed sydd wedi'i halogi'n ormodol â baw adar neu ddeunydd arall sy'n dod o adar. Ystyr halogi yn ormodol yw halogedig â deunydd gormodol sy'n dod o adar, y tu hwnt i'r hyn y gellid ystyried yn rhesymol ei fod wedi'i gynhyrchu wrth gludo adar i'r crynhoad. Rhaid i'r trwyddedai wneud y gofyniad hwn yn hysbys ymlaen llaw i'r holl gyfranogwyr yn ei lenyddiaeth hysbysebu, ar ffurflenni mynediad neu drwy unrhyw ddulliau priodol eraill.

10) Rhaid i'r trwyddedai sicrhau bod unrhyw ardaloedd ar y fangre (lle bydd y crynhoad) sy'n agored i adar neu ddeunydd ysgarthol a'r holl arwynebau solet yn cael eu glanhau a'u diheintio'n drylwyr cyn gynted ag y bo'n rhesymol ymarferol:

11) Rhaid i'r trwyddedai:

- a) sicrhau na fydd adar yn cael mynediad i grynhoed oni bydd y cyfranogwr yn datgan nad ydynt yn dod o fangre neu ardal sydd o dan gyfyngiadau sy'n gysylltiedig â chadarnhad o bresenoldeb clefyd adar hysbysadwy, gan gynnwys o unrhyw Barth rheoli clefyd dros dro sydd wedi'i osod gan Weinidogion ac y gall ddarparu Rhif CPH dilys i gadarnhau hyn (os oes angen); a

b) sicrhau, pan fyddant yn cyrraedd lleoliad y digwyddiad bod yr adar yn aros ar wahân i bob aderyn a mamaliaid arall ar safle'r digwyddiad nes bod yr holl adar o'r fath wedi cael eu harchwilio'n unigol gan geidwad adar, gwerthwr neu farnwr digon profiadol a ddynodwyd gan y trwyddedai; a

c) sicrhau yr hysbysir APHA yn syth os bydd unrhyw adar yn methu'r archwiliad, neu'n dangos arwyddion posibl o glefyd adar hysbysadwy yn ystod y digwyddiad. Hefyd, rhaid i'r adar hyn gael eu rhwystro rhag bod yn rhan o'r crynhoad a'u cadw ar wahân i adar eraill ar unwaith nes y bydd arolygydd milfeddygol wedi'u harchwilio a bod awdurdod ysgrifenedig wedi'i gael gan APHA sy'n caniatáu iddynt adael y crynhoad.

d) sicrhau bod yr holl ddeunydd gwastraff, gan gynnwys unrhyw fwyd y gall unrhyw adar fod wedi mynd ato, a phob sarn, tail, carcasau adar neu ddefnydd arall sy'n dod o adar ac sydd wedi'u gadael ar ôl ar ddiwedd y digwyddiad yn cael eu:

i. gwaredu fel na all adar (yn cynnwys adar gwyllt) fynd atynt (dylai hyn gynnwys defnyddio bagiau dwbl, a'u cludo ymaith yn ddiogel gan gwmni gwastraff trwyddedig addas); neu

ii. trin er mwyn cael gwared â'r risg o drosglwyddo clefyd; a

iii. bod ardaloedd lle ceir deunydd o'r fath hefyd yn cael eu glanhau a'u diheintio'n briodol.

e) sicrhau bod unrhyw gaetsys, cratiau, basgedi, corlannau neu gynwysyddion arall na chawsant eu symud o'r fangre neu gerbyd a ddefnyddir ar gyfer y crynhoad gan y rheini a ddaeth i'r crynhoad yn cael eu glanhau a'u diheintio cyn gynted ag y bo'n rhesymol ymarferol ar ôl diwedd y crynhoad ac ym mhob achos cyn iddynt gael eu defnyddio eto; a

f) sicrhau bod cyfleusterau glanhau a diheintio (er enghraifft, cyfleusterau golchi dwylo, matiau diheintio a dipiau traed) ar gael i gyfranogwyr ac ymwelwyr yn y safle, a bod cyfranogwyr yn glynu wrth arferion bioddiogelwch da; a

g) sicrhau nad oes neb y gellir gweld ei fod wedi'i heintio â thail, plu neu ddeunydd arall sy'n dod o adar yn cael dod i mewn i ardal yr adar nes y ceir gwared â halogiad o'r fath.

12) Argymhellir hefyd i'r trwyddedai sicrhau bod llawfeddyg milfeddygol ar gael i fynychu ar fyr rybudd yn ystod yr holl amser y mae adar yn bresennol yn y cynulliad, a sicrhau ei fod yn cael ei ymgynghori ynghylch unrhyw bryderon iechyd neu les adar. Fodd bynnag, dylid rhoi gwybod am amheuaeth o glefyd adar hysbysadwy yn uniongyrchol ac ar unwaith i APHA

Lleoliad y crynhoad

13) Rhaid peidio â lleoli'r crynhoad mewn unrhyw Barth Gwarchod ar gyfer clefydau adar hysbysadwy, Parth Gwyliadwriaeth, Parth Rheoli Dros Dro, Parth Rheoli (Monitro) Adar Caeth, Parth Cyfyngu ar Symud Dros Dro neu Ardal o dan Gyfyngiadau Ffliw Adar Pathogenedd Isel neu Barth Atal Ffliw Adar gyda mesurau i gadw adar dan do, ac os caiff parth o'r fath ei ddatgan yn ystod y crynhoad, rhaid rhoi trefniadau'r cynllun wrth gefn ar waith yn syth (gweler amod 16 isod) a gofyn am gyngor gan APHA.

Cadw cofnodion

14) Rhaid i'r trwyddedai fynnu bod yr holl gyfranogwyr sy'n dod ag adar i grynhoad, ac eithrio cyfranogwyr yn dod â cholomennod rasio i ras colomennod, yn llenwi ac yn dychwelyd ffurflen ddatgan wedi'i llofnodi cyn caniatáu mynediad i fannau lle mae adar byw yn cael eu cadw neu'n cael eu crynhoi, gan gadarnhau:

a) eu bod wedi darllen y gofynion boddlogelwch ac y byddant yn cydymffurfio yn llawn â'r holl wybodaeth honno; a

b) nad yw'r adar hyd eithaf eu gwybodaeth wedi bod mewn cysylltiad ag unrhyw fath o glefyd adar hysbysadwy ac nad ydynt yn dangos unrhyw arwyddion o haint; a

c) cyfeiriad mangre wreiddiol yr adar, gyda chadarnhad nad yw'r adar yn dod o fangre mewn Parth Gwarchod, Parth Cadw Gwyliadwriaeth, Parth Rheoli Dros Dro, Parth Rheoli Symudiadau Dros Dro, neu barth rheoli clefyd adar hysbysadwy arall; a

d) bod y fangre wreiddiol wedi'i chofrestru ar y [Gofrestr Adar a Gedwir](#) (ar gyfer mangreoedd yng Nghymru a Lloegr) neu'r [Gofrestr Adar a Gedwir yn yr Alban](#) (SKBR) ar gyfer mangreoedd yn yr Alban a'u bod wedi rhoi manylion Rhif CPH (os yw'n berthnasol).

15) Rhaid i'r trwyddedai gadw cofnod o'r holl bobl sy'n dod ag adar eraill i'w crynhoad, neu sy'n mynd â'r cyfryw adar o'r crynhoad, a chadw'r cofnod hwnnw am o leiaf dri mis ar ôl y digwyddiad. Pan fo'n bosibl dylai hwn fod mewn fformat sydd ar gael yn electronig. Rhaid i'r trwyddedai gyflwyno'r cofnodion hyn ar gais arolygydd APHA neu arolygydd Awdurdod Lleol. Rhaid rhoi'r cofnod i arolygydd os gaiff gais i wneud hynny. Rhaid i'r cofnod gynnwys yr wybodaeth ganlynol o leiaf:

a) enw llawn;

b) cyfeiriad cartref gan gynnwys y cod post a manylion mangre wreiddiol yr adar os yw'n wahanol i'r cyfeiriad cartref, gan gynnwys Rhif CPH

c) rhifau ffôn (llinell dir a/neu symudol)

d) cyfeiriad e-bost (os yw ar gael)

e) y nifer a'r mathau o adar a gafodd eu harddangos, eu rasio, eu hailgartrefu, eu prynu neu eu gwerthu, a manylion cyrchfan wreiddiol a newydd yr adar

f) y datganiad wedi'i llofnodi yn gynnwys yr holl fanylion y cyfeirir atynt yn amod 13 (sy'n ofynnol ar gyfer yr holl gyfranogwyr ac eithrio'r rhai sy'n dod â cholomennod rasio i ras).

16) Fel amod ar gyfer cael mynediad i bob digwyddiad neu grynhoad, rhaid i'r trwyddedai fynnu bod yr holl gyfranogwyr yn archwilio'u hadar am unrhyw haint cyn ymadael â'r digwyddiad neu grynhoad.

Cynllun Wrth Gefn

17) Rhaid i'r trwyddedai fod â threfniadau cynllun wrth gefn ysgrifenedig ar waith a'r rheini ar gael i'w harchwilio. Bydd y rhain yn nodi beth fydd yn digwydd os bydd clefyd adar hysbysadwy yn cael ei amau neu ei gadarnhau yn y digwyddiad neu gerllaw. Rhaid i'r cynllun gynnwys:

(a) sut y bydd adar yr amheuir bod ganddynt glefyd adar hysbysadwy yn cael eu gwahanu oddi wrth adar eraill; a

(b) os amheuir bod clefyd adar hysbysadwy yn y crynhoad, rhaid i'r cynllun esbonio sut bydd adar, offer a cherbydau a ddefnyddir ar gyfer cludo adar i'r crynhoad yn cael eu cadw yn y fangre nes y bydd Arolygydd Meddygol APHA wedi rhoi cyfarwyddyd a fydd yn caniatáu i adar adael y fangre; a

(c) trefniadau i gadw adar ym mangre'r digwyddiad neu gerbyd a ddefnyddiwyd ar gyfer y crynhoad os yw'r symudiadau oddi yno wedi cael eu cyfyngu oherwydd i'r crynhoad wedyn fod mewn parth rheoli clefyd adar hysbysadwy.

Nodiadau

1) Mae'r rheolau statudol ar grynoadau adar yn berthnasol i bawb sy'n cadw adar, pa un a yw'r adar yn cael eu cadw'n fasnachol, fel hobi neu fel adar anwes.

2) Bwriad y gwaith o reoli crynoadau adar yw lleihau'r risg o ledaenu feirws fflw adar sydd heb ei ganfod. Mae rheoliad 6 o Reoliadau Fflw Adar (Mesurau Atal) (Cymru) 2006 yn gwahardd casglu dofednod neu adar caeth eraill ynghyd oni bydd Gweinidogion Cymru wedi trwyddedu hynny. Mae Erthygl 4(4) o Benderfyniad Gweithredu'r Comisiwn (EU) 2018/1136 yn caniatáu crynoadau dim ond os oes mesurau bioddiogelwch boddhaol ar waith i atal y risg o drosglwyddo clefyd. Mae'r drwydded hon yn cwmpasu amrywiaeth o sefyllfaoedd lle mae adar yn cael eu casglu ynghyd a bwriad y testun a ganlyn yw helpu ceidwaid adar i ddeall a yw'r rheolau hyn yn berthnasol i'w gweithgarwch hwy.

3) Mae'r nodweddion canlynol yn dangos bod crynhoad adar yn cael ei gynnal:

- dod ag adar o leoliadau gwahanol ynghyd i leoliad y crynhoad, ac wedyn symud i fangre cyrchfan yr adar, a all fod eu lleoliadau gwreiddiol neu leoliadau newydd;
- adar yn aros yn lleoliad y crynhoad am 14 diwrnod neu lai, ar ôl i'r aderyn olaf gyrraedd.

4) Dyma enghreifftiau o grynoadau:

- ffeiriau, marchnadoedd, sioeau, gwerthiannau neu arddangosfeydd adar
- colomennod yn cael eu crynhoi, gan gynnwys cerbydau neu gorlannau rhyddhau, ar gyfer rasio colomennod
- crynhoad o adar hela gwyllt (pan maent yn dod o nifer o leoliadau i un lleoliad ac yn cael eu symud wedyn i fangre wahanol)
- symud adar (ac eithrio lle mae'r symud yn syth i'r lladd-dy), gwerthu adar neu ailgartrefu adar, gan gynnwys drwy fasnachu neu werthu ar y rhyngwrdd, 'gwestai' ieir (pan fydd adar wedi'u lleoli dros dro yn rhywle heblaw eu hadeilad arferol), lle mae adar (pa un ai'r rhain sy'n cael eu gwerthu neu beidio) wedi dod i'r fangre yn ystod y 14 diwrnod blaenorol.
- adar o nifer o leoliadau sydd wedi dod ar gerbyd ac yna eu gollwng mewn nifer o leoliadau eraill.
- dofednod (gan gynnwys adar Anseriforme neu Galliforme) neu wyau deor o un fangre sy'n cael eu cludo i leoliad gwahanol i'w dangos mewn sioe, eu harddangos, eu gwerthu a lle mae adar caeth eraill hefyd yn bresennol e.e. arddangosfa heboga. Ystyrir bod y crynhoad hwn yn grynhoed dofednod.

5) Ni thybir bod y canlynol yn grynoadau adar:

- casglu adar mewn lladd-dy trwyddedig ar gyfer eu lladd
- dofednod sy'n cael eu dwyn ynghyd o leoliadau gwahanol, ond lle nad oes dim adar yn gadael tan i fwy na 14 diwrnod fynd heibio ers i'r aderyn olaf gyrraedd y fangre
- gwerthu adar fel masnachwr neu dros y rhyngwrdd pan nad oes dim adar yn gadael tan i fwy na 14 diwrnod fynd heibio ers i'r aderyn olaf gyrraedd y fangre (Gwahardd gwerthu adar anwes gan ddeliwr masnachol mewn unrhyw ran o stryd neu fan cyhoeddus, neu mewn stondin neu ferfa drol mewn marchnad yn unol ag adran 2 o Ddeddf Anifeiliaid Anwes 1951)
- lle mae'r holl adar sydd wedi cael eu crynhoi wedi dod o'r un fangre ac yn dychwelyd i'r fangre honno wedyn
- gwerthu adar sydd i gyd wedi dod o'r un fangre (arwerthiant gwasgaru neu 'ailgartrefu')

- casglu adar hela gwyllt yn ystod y tymor agored perthnasol pan maent wedi dod o sawl lleoliad ond yn cael eu symud wedyn i un lleoliad, ac yn aros yno ar gyfer bridio a dibenion eraill
- sioe sy'n cynnwys wyau bwrdd yn unig.

Nid yw'n fwriad i'r rhestrau yn nodyn 4 a nodyn 5 fod yn rhai cynhwysfawr.

6) Er nad oes angen trwydded ar gyfer digwyddiadau nad ydynt yn grynoadau, mae'n arfer gorau mabwysiadu mesurau bioddiogelwch a chadw cofnod o symudiadau adar i'r fangre ac oddi arni neu ar gerbyd ac oddi arno.

7) Os nad ydych yn siŵr a oes angen trwydded ar gyfer eich gweithgarwch, gall APHA roi rhagor o gyngor yn y manylion cyswllt isod.

8) Mae Erthygl 11 (Colomennod Rasio) o Orchymyn Clefydau Dofednod (Cymru) 2003 yn ei gwneud yn ofynnol:

“(1) Rhaid i drefnydd sioe neu ras sy'n cael ei chynnal yn gyfan gwbl neu'n rhannol yng Nghymru sicrhau bod pob colomen rasio sydd wedi'i chofnodi ar gyfer ras neu'r sioe wedi'i brechu yn erbyn paramycsofirws 1 mewn colomennod.

(2) Rhaid i bob person sy'n berchennog ar golomennod rasio neu'n eu cadw gadw cofnod o bob ras neu sioe y mae'n rhoi colomennod ynddynt.”

9) Mae Rheoliadau 2006 yn cynnwys y diffiniadau a ganlyn -

ystyr “aderyn caeth arall” (“*other captive bird*”) yw unrhyw aderyn a gedwir yn gaeth ac nad yw'n ddofednyn ac mae'n cynnwys aderyn anwes ac unrhyw aderyn a gedwir ar gyfer sioeau, rasmus, arddangosfeydd, cystadlaethau, bridio ac i'w werthu;

ystyr “dofednod” (“*poultry*”) yw'r holl adar sy'n cael eu magu neu eu cadw'n gaeth at ddibenion:

- i. cynhyrchu cig neu wyau i'w bwyta neu gynhyrchion masnachol eraill;
- ii. ail-stocio cyflenwadau adar hela; neu
- iii. unrhyw raglen fridio ar gyfer cynhyrchu'r categorïau adar hyn neu gynhyrchion a nodir yn is-baragraffau (i) a (ii)

ond nid yw'n cynnwys unrhyw aderyn a gedwir at ddibenion un aelwyd, lle nad oes gan yr aderyn na'i geidwad unrhyw gyswllt uniongyrchol nac anuniongyrchol â chyfleusterau dofednod neu ddofednod eraill, a bod yr aderyn a chynhyrchion yr aderyn yn cael eu defnyddio mewn un aelwyd neu at ddibenion yr un aelwyd yn unig.

10) Mae Strategaeth Rheoli Clefydau Adar Hysbysadwy ar gyfer Prydain Fawr yn diffinio ‘clefyd adar hysbysadwy’ fel fflw adar a chlefyd Newcastle.

11) Mae Gorchymyn Clefydau Dofednod (Cymru) 2003 yn diffinio “colomen rasio” i olygu unrhyw golomen sy'n cael ei chludo neu y bwriedir ei chludo o'i cholomendy (sef unrhyw adeilad sy'n cael

ei ddefnyddio ar gyfer cadw neu fridio colomennod rasio) i'w rhyddhau er mwyn iddi allu hedfan yn ddirwystyr yn ôl i'w cholomendy neu i unrhyw gyrchnod arall.

12) Mae diheintyddion sydd wedi'u cymeradwyo i'w defnyddio yn erbyn clefydau dofednod yn cael eu rhestru yn: [Diheintyddion a gymeradwywyd gan DEFRA | Diheintyddion a gymeradwywyd ar gyfer rheoli clefydau anifeiliaid hysbysadwy statudol ym Mhrydain Fawr](#)

13) Rhaid i unrhyw un sydd ym meddiant unrhyw aderyn neu garcas aderyn, ac yn amau y gallai fod wedi'i heintio â chlefyd adar hysbysadwy, roi gwybod yn syth i swyddfa yr Asiantaeth Iechyd Anifeiliaid a Phlanhigion.

14) Rhaid cydymffurfio â gofynion perthnasol Gorchymyn Lles Anifeiliaid (Cludo) (Cymru) 2007 a/neu Orchymyn Cludo Anifeiliaid (Glanhau a Diheintio) (Cymru) (Rhif 3) 2003.

15) Mae rhagor o gyngor ar fesurau bioddiogelwch ac unrhyw ddeddfwriaeth a all fod yn berthnasol ar gael yn LLYW.Cymru neu gan APHA.

16) Ar gyfer crynadau sy'n cynnwys casglu adar caeth eraill ynghyd yng Nghymru, rhaid i chi fodloni gofynion y [drwydded gyffredinol ar gyfer adar caeth eraill](#).

Cysylltu ag APHA

17) Gellir cysylltu ag APHA drwy'r:

- Ganolfan Cyngor i Gwsmeriaid yn customeradvice@apha.gov.uk
- Llinell gymorth ar gyfer cwsmeriaid yng Nghymru **0300 303 8268**